

申冕盟先生年譜附傳
金姬傳附別記
阿計替傳

同昌公主外傳
袁天綱外傳



同昌公主外傳

撰人不詳

中華書局

同昌公主外傳

此據古今說海本
排印初編各叢書
僅有此本

同昌公主外傳

咸通九年。同昌公主出降宅于廣化里。錫錢五百萬貫。仍罄內庫寶貨以實其宅。而房櫳戶牖。無不以衆寶飾之。更以金銀爲井欄藥臼。食櫃水槽。鐙釜盆甕之屬。仍縷金爲箴籬篋筐。製水精火齊琉璃玳瑁等床。悉支以金龜銀甌。更琢五色玉爲器什。合百寶爲圓案。更賜金麥銀粟共數斛。此皆太宗朝條支國所獻也。堂中設連珠之帳。却寒之簾。犀簾牙席。龍鳳繡連珠帳。續眞珠以成也。却寒簾類玳瑁斑。有紫色。云却寒之鳥骨所爲也。則未知出在何國。更有鸛鵲枕。翡翠匣。神絲繡被。其枕以七寶合爲鸛鵲。翡翠毛羽。神絲繡被。三千鴛鴦。仍間以奇花異葉。則精巧瑰麗。可得而知矣。其上綴以蠶粟之珠。如粟粒五色輝煥。更帶鐲忿犀。如意玉。其犀圓如彈丸。入土不朽爛。帶之令人鐲忿怒。如意玉類桃實。上有七孔。云通明之象。更有瑟瑟幕。紋布巾。火蠶綿。九玉釵。其幕色如瑟瑟。闊三丈。長一百尺。輕明虛薄。無以爲比。向空張之。則踈朗之紋。如碧絲之貫其珠。雖大雨暴降。不能濕漏。云以蛟人瑞香膏所傳故也。紋布卽手巾也。潔白如雪。光軟拭水不濡。用之彌年。亦未嘗生垢膩。二物稱得鬼谷國。火蠶綿。云出火洲。絮衣一襲。用之一兩。稍過度。則熇蒸之氣不可近。云九玉釵上刻九鸞。皆九色。其上有字曰玉兒。工巧妙麗。殆非人製。有得於金陵者。因以獻。公主酬之甚厚。一日晝寢。夢絳衣奴致語云。南齊潘淑妃取九鸞釵。及覺。具以夢中之言言於左右。公主薨。其釵亦亡其處。韋氏異其事。遂以實話於同人。或曰玉兒卽潘妃小字。逮諸珍異。不可

具載。漢至唐。公主出降之盛。未之有也。公主乘七寶步輦。四面綴五色玉。香囊囊中貯辟邪香。瑞麟香。金鳳香。此皆異國獻也。仍雜以龍腦金屑。則鑲水晶。瑪瑙。辟塵犀爲龍鳳花其上。仍絡真珠玳瑁。更以金絲爲流蘇。雕輕玉爲浮動。每一出遊。則所過芬香。街巷晶照。看者眩惑其目。是時某中貴人。買酒於廣化旗亭。忽相謂曰。坐來香氣。何太異也。同席曰。豈非龍腦邪。曰非也。余幼給事於嬪妃宮。故常聞此。未知今日自何而致。因顧問當壇者。云公主步輦。以錦衣換酒於此。中貴人共請視之。益歎其異。上每賜御饌。湯藥。則道路之使相屬。其饌有消靈炙。紅虬脯。其酒則有凝露漿。桂花醴。其茶則綠花紫英之號。消靈炙。一羊之肉。取之四兩。雖經暑毒。終不臭敗。紅虬脯。非虬也。但貯於盤中。虬體如紅絲。高一丈。以筯抑之。無三數分。撤卽復其故。迨諸品味。人莫能識。而公主家人饜飫。如里中糠粃。一日大會韋氏之族於廣化里。玉饌俱陳。暑氣將甚。公主命取澄水帛以蘸之。挂于南軒。滿座則皆思挾纊。澄水帛長八九尺。似布輕細。明薄可鑑。云其中有龍涎。故能消暑也。韋氏諸宗。好爲葉子戲。夜則公主以紅琉璃盤盛夜光珠。令僧祁捧立堂中。而光明如晝焉。公主始有疾。召術士來寶爲燈法。乃以香蠟燭遺之。來氏之隣人。覺香氣異常。或詣門詰其故。寶則具以事對。其燭方二寸。其上被五彩文。卷而燻之。竟夕不盡。郁烈之氣。可聞於百步餘。煙出其上。卽成樓閣臺殿之狀。或云燭中有蜃脂也。公主疾旣甚。醫者欲難藥餌。奏云。得紅蜜白猿膏。食之可愈。上令訪內庫。得紅蜜數石。本羯羯國所貢。白猿膏數甕。本南海所獻也。雖日如餌。終無其驗。公主薨。上哀痛甚。遂自製挽歌詞。令百官繼和。及庭祭日。百司與內官皆用金于飾車輿服玩。以焚於韋氏庭。

章家爭取灰以擇金寶。及葬於東郊。上與淑妃御廷興門。出內庫金玉駝馬鳳凰麒麟各高數尺以爲儀。其衣服玩具與人無異。一物以上皆至一百二十兒。刻木爲樓殿蒲鳳花木人畜之象者。不可勝計。以絳羅裙縠絡金銀瑟瑟爲帳幕者千隊。結爲幢節傘蓋。彌街翳日。旌旗珂珮鹵簿。率多加等以賜。紫尼及女道士爲侍從引翼。則焚昇香靈芝香。而擊歸天紫金之碧磬。繁華輝煥。殆餘二十里上。賜酒一斗斛。餅嚼三十駱駝。各徑闊二尺。飼役夫也。京城士庶。罷業來觀者。流汗相慰。唯恐居後。及靈輿過延興門。上與淑妃慟哭。中外聞者無不傷痛。同日葬乳母。上更作祭乳母文。詞質而意切。人多傳寫。是後上日夕惴心挂意。李可及歎追百年曲聲詞怨切。聽之莫不淚下。更教千數人作歎百年隊。取內庫珍寶雕成首飾。畫八百匹官綾作魚龍波浪文以爲地衣而舞。一舞珠翠滿地。可及官歷大將軍。賞賜盈萬。甚無狀。左軍容使西門季玄素所梗直。乃謂可及曰。爾恣巧媚以惑天子。族無日矣。可及恃寵未嘗改作。可及善嚙喉舌於天子前。弄眼作頭腦。連聲著詞。唱雜聲曲。須臾則百數不休。是時京城不調少年相效。謂之拍彈。去聲。一日可及乞假爲子娶婦。上曰。卽令送酒麪及米以助汝嘉禮。可及歸至舍。見一中貴人。監二銀槓。各高二尺餘。宣賜可及。始謂之酒。及封啓。皆實中也。上賜可及銀麒麟高數尺。可及取官庫車載往私第。西門季玄曰。今日受賜。吏用官車。他日破家。亦須輦還內府。不道受賞。徒勞牛足。後果流可及於嶺表。舊賜珍玩悉皆進納。君子謂季玄有先見之明。